

բոլորովին մերկ ոտները: Բայց մենք ցաւ չէինք զգում: Մենք շատ ուրախ էինք եւ խիստ եռանդով կը պանք գործին: Մարիամը եւ Մագթաղը իրանց մանրիկ ձեռներով հաւաքում էին ընկած հասկերը եւ ինձ վրայ ծիծաղում էին, որովհետեւ ես ծոյլ էի: Նրանք փունջեր էին կապում հասկերից, եւ երկու քոյրեր մրցութիւն էին անում, թէ որը շատ կհաւաքէ: Խեղճ երեխաներ, կարծես զգում էին, թէ ձմեռը քաղցած կը մնան, եթէ այժմ պաշար չպատրաստեն: Մայրս նայում էր նրանց վրայ եւ լաց էր լինում...

Երեկոյեան ժամուն մեզանից ամեն մէկը իր հաւաքածը կապեց շալապին, դարձանք տուն: Մարիամը եւ Մագթաղը իրանց բեռներով մի առանձին հպարտութեամբ հանդիպեցին քեռուս երեխաներին, որպէս անխոնջ մշակներ, որ դառնում էին դաշտից:

Այսպէս ամեն օր, վաղ-առաւօտեան գնում էինք դաշտ հասկաքաղ անելու եւ երեկոյեան վերադառնում էինք: Մեր խորճի դռան առջեւ կազմուեցաւ մի փոքրիկ դեզ հաւաքած հասկերից: Այնուհետեւ սկսեցինք մեր կալը կալսել: Բայց նա այնքան մեծ չէր, որ հարկաւոր լինէր կալսել ջարջառով: Մայրս սկսեց իր ձեռքով մանրել հասկերը մի հաստ փայտով, որը այնքան ծանր էր, որ ես դժարութեամբ կարողանում էի բարձրացնել: Երբ յարող բամբակ տոնեցինք, մաքուր ցորենը հաւաքեցինք թաղարների մէջ: Ձմեռոյ մեր հացի պաշարը արդէն պատրաստ էր:

Դեռ մնում էր ամենահարկաւորը — վառելիքը: Մեր խարխուլ բնակարանի համար պէտք էր բաւական տաքութիւն, մանաւանդ որ ձմեռը այս կողմերում խիստ սաստիկ է լինում: Մայրս այնքան զբաղուած էր, որ ամենեւին ժամանակ չունէր հոգ տանելու վառելիքի մասին. այդ պատճառով, այդ հոգսը մնաց իմ եւ քոյրերիս վրայ: Մայրս իր ձեռքով հիւսեց երեք փոքրիկ կը թոցներ, մէկը ինձ համար, երկուսը Մարիամի եւ Մագթաղի համար: Տեսնելու էր, թէ որպիսի՜ ուրախութեամբ մենք այդ կթոցները առնում էինք մեր ուսերի վրայ եւ ամեն օր գնում էինք դաշտը. այնտեղ հաւաքում էինք քակորներ, ծամերից թափուած տերեւներ, փուշ եւ մացառներ, եւ բերում էինք ձմեռը մեր խորճի թաքացնելու համար: Ա՛խ, որքա՛ն լաւ բան է եղել աշխատութիւնը: Ես այնուհետեւ միշտ յարգանքով էի նայում այն քակորների կոյտի վրայ, որ ինքս էի հաւաքել, եւ բարկանում էի, թէ ինչո՞ւ ինչայդովութեամբ չէին գործ ածում, թէեւ մօրս ինչայդովութիւնը հասնում էր ժլատութեան:

Ձմեռոյ մեր ապրուստը բաւական ապահոված կը լինէր, եթէ մի մեծ դժարութիւն դեռ մնացած չլիներ: Մայրս պէտք է վճարէր հարկերի վերջին վեցամսեակը: Թէեւ մենք այժմ ոչ տուն ունէինք եւ ոչ տեղ, ոչ հող ունէինք եւ ոչ ցանք, բայց հարկը դարձեալ պահանջում էին: Պահանջում էին գլխաւո-